

# Акафист мученице Зинаиде

## Кондак 1

Избранней Невесте Христовой Зинаиде от любви сердечныя исходящее сие акафистное сплетенное пение, яко много могущей своими праведными мученическими к Богу молитвами споспешествовати нашему спасению и от всяких бед избавити к ней притекающих, сего ради согласно зовем вси: Радуйся, святая мученице Зинаидо, молитвеннице о почитающих тя.

## Икос 1

Ангелообразно в мире поживши всеблаженная стратотерпице Зинаидо, ангельский лик на небеси восполнила еси. Но воспевая ныне со ангелы и священных дев мучениц ликом песнь Триединому Богу, не забуди и нас земнородных сродных твоих в день страсти твоея воспевающих сице: Радуйся, избранная угоднице Божия; Радуйся, верная раба Господа Твоего; Радуйся, агнице, Агнцу Христу, последовавшая; Радуйся, Невесто Христова прекрасная; Радуйся, чистотою девства просиявшая; Радуйся, мучений кровью украсившая. Радуйся, святая мученице Зинаидо, молитвеннице о почитающих тя.

## Кондак 2

Видяще святая Зинаидо с сестрою твоею Филониллою житие и труды сродника твоего пресветлаго Павла, прежде церковь Божию гонившаго, последи же по премногу великими апостольскими подвиги ю разширившаго и украсившаго и сами восхотесте всею душею Христу работати, темже от идол бездушных отвращении и вере Христовой святым Павлом научении возопили Богу: Аллилуиа.

## Икос 2

Разум Богопросвещен приявши премудрая Зинаидо, уразумела еси суету мира сего и избрала еси едино души твоей потребно еже благоугодити Богу, темже с Филониллою сродницей по плоти и духу себе, стяжаний матере своя отвергшися и апостолом подражаючи Христа проповедовала еси. Обращении же тобою к вере истинней, возопиша к тебе таковая: Радуйся, мудрая дева, мира отвергшаяся, да Христа приобрящещи; Радуйся, мудрая дева, родительницу оставляющая да к Богу Отцу Небесному, приближишися. Радуйся великаго Павла ученица пресветлая; Радуйся, духом Евангелия от языков апостола упоенная. Радуйся, от Тарса изшедшая и апостольский путь прошедшая; Радуйся, Царство Небесное людем

благовестившая. Радуйся, святая мученице Зинаидо, молитвеннице о почитающих тя.

### **Кондак 3**

Силою благодати Христовы одеявшись преславная Зинаидо, навыкла еси силе и художеству врачебному и Самому Господу, яко верная Его ученица, подобаясь проходила еси вси грады проповедаючи Евангелие и безсребренно врачующи всякий недуг и всяку язву в людех. Исцели убо и наши недуги душевные и телесные, святая дева, данною тебе благодатию, да выну вопием о тебе Богу: Аллилуиа.

### **Икос 3**

Имуща в сердце и помышлении своем словеса Давида пророка «се что добро или что красно, но еже жити братии вкупе». Во граде Деметриадский святии сестренницы Зинаидо и Филонилло достигшаго и в вертеп некий вшедше, тамо житие равноангельское провождаху не престаючи ова недуг людей врачевати, ова же в подвизах и чудесех святы, обоя вкупе Господа в душах и телесех прославляти и проповедати, таковому убо дивному житию вашему чудящися зовем: Радуйся, Зинаидо безсребнице предивная; Радуйся, многия и лютыя болезни человеком отгнавшая. Радуйся, с Филониллою долгому бдению и пощению себе вдавшая. Радуйся, чудна знамения совершившая. Радуйтесь, вкупе Давидски добро и красно течение скончавши. Радуйтесь, сестры по плоти сестрам по духу себе явивши. Радуйся, святая мученице Зинаидо, молитвеннице о почитающих тя.

### **Кондак 4**

Бурею злобы и зависти бесовския дышуще на вас, блаженные сестры, окрест живущия языцы, яко умалися вами суетное их идолом, паче же бесом поклонение, ради проповеди вашей чудес и знамений, неистовством воспылаша на вас, убити от отца лжи вас поучашеся во мраце скверны своя, не ведуще пети Богу: Аллилуиа.

### **Икос 4**

Слышавше премногую твою добродетель, блаженная Зинаидо, люди благоразумныя отовсюду устремляхуся к тебе, с верою во врачующую благодать в тебе сущую и приемлюще скорая исцеления, прославляху Бога и тебе целительницу и угодницу Его величаху пении сими: Радуйся, помазанная миром благодати; Радуйся, Божественных даров приятелище; Радуйся, милостей Господних источнице; Радуйся, скорая помощнице страждущих; Радуйся, наставнице заблуждающих; Радуйся, благочестивых изрядная славо.

Радуйся, озлобляемых твердая стено. Радуйся, святая мученице Зинаидо, молитвеннице о почитающих тя.

### **Кондак 5**

Боготечней звезде была еси подобна, прехвальная, во граде Деметриаде, страны светом дел твоих освящающая, слово благовестия знаменьями утверждаючи, всех научающая Истинному Солнцу Правды Христу Богу пети: Аллилуиа.

### **Икос 5**

Видевше твое великое к болящим телом и душою людем сострадание, к тебе притекающим светлейшая Зинаида, озари убо от горних высот светом твоего врачевания и наша недугующая телеса и грехом потемненныя души, да воставше и исправившеся тобою радостно вопием ти: Радуйся, мироварнице на вся недуги врачевания источающая. Радуйся, лечебнице быстрая и милосердная. Радуйся, сострадательнейшая человеком благодетельнице; Радуйся, язв телесных и скорбей душевных наших посетительнице. Радуйся, требующих заступления твоего не отвращающая; Радуйся, выну о нас пред Богом ходатайствующая. Радуйся, святая мученице Зинаидо, молитвеннице о почитающих тя.

### **Кондак 6**

Проповедником духовным апостолом истинно сравнилася еси всехвальная дева и к тебе бо словеса Владычная преложившася, егда рече своим учеником: «Шедше проповедуйте, яко приближися Царствие Божие, болящия исцеляйте, прокаженныя очищайте туне приясте, туне дадите». Все люди научающе верно Богу пети: Аллилуиа.

### **Икос 6**

Возсия миру свет истины Евангельския и ожесточися и очистися в безсилии своем прогоняемая им тьма прелести бесовския: не терпя бо своего поражения, лукавый змий тела мучеников яростно сокрушает, но тем паче душам их ко Христу скорее прейти возмозает. И zde убо духом злобы научении языцы безумнии приведши нощию, яко сынове тьмы сущии в вертеп святых дев Зинаиды и Филониллы, тела их камнями до успения смертнаго побиша, их же душ в селения райския среташе, чини ангельстии возопиша сицевая: Радуйтесь, святии мученицы добре страдальчествовавши и ныне венчающияся. Радуйтесь, лики безплотных и мученик число predeterminedное восполняющих. Радуйтесь, Стефану первострадальцу образом кончины подобныя; Радуйтесь, Фекле, жен начальнице нравов жития

равныя. Радуйтесь, телеса убиении, души же ваша в руке Божии и муки их не прикосневся; Радуйтесь, сынами тьмы во тме ночней посечении, но светло и ясно память ваша на земли славится вкупе с Филониллою. Радуйся, святая мученице Зинаидо, молитвеннице о почитающих тя.

### **Кондак 7**

Хотящи Господу благоугодити оставила еси дом родительский и в вертеп вселилася еси, в вертепе же ради Рожденнаго: и тамо заповеди Его сотворивши и иных научивши, даже до смерти мученической верна была еси с другинею твоею Ему, страданице Зинаидо, темже за сие венец правды ныне приявши, поеши Тому вечно на небеси: Аллилуиа.

### **Икос 7**

«Новую заповедь даю вам, да любите друг друга, – рече Господь ко избранным Его – больше бо сея любви никтоже имать, да кто душу свою положит за други своя». Сея заповеди верную исполнительницу видим тя Богоизбранная мученице Зинаидо, любовь велию к Богу и ближнему своему в житии явившую, и душу свою за други, паче же за Христа яко друга и жениха своего положившую. Сего ради и мы с любовию днесь вопием ти: Радуйся, любвеобильная страданице, милосердием к человеком преисполненная: Радуйся, дивная стратотерпице ближнего своего, яко сама себе возлюбившая. Радуйся верная ученице Христова, заповеди Его прекрасно соблюдшая: Радуйся, за Христа и добрая дела твоя от злодеев камнями побиевшая. Радуйся, сими камнями, ко краеугольному камню – Христу, любовию приобщившаяся. Радуйся, яко голубице чистая, душею к Чистейшему скоро воспарившая. Радуйся, святая мученице Зинаидо, молитвеннице о почитающих тя.

### **Кондак 8**

Странное и преславное чудо видим на тебе добрая мученице Зинаида, тебе бо от любви Божией, яко же твой сродник Павел – ничтоже разлучити возмогло есть: ни скорбь, ни теснота, ни гонение, ни глад, ни нагота, ни беда, ни меч каменный, никакая тварь, ни живот, ни смерть разлучи. Ты душею к Богу в райския селения взлетевши, паче с Ним соединилася еси, но и от человек по смерти не разлучалася еси, приклоняющи милостиво ухо ко всем тебе верою призывающим и помогающи всем чтущим память твою, Богу же вопиюще: Аллилуиа.

### **Икос 8**

Весь еси делание и желаний краю, весь еси сладость моя – Сладчайший Иисусе – тако взывала еси мученице Зинаидо в молитвах своих ко Господу, всею душою и сердцем к Тому горевшая, егда нечестивии человецы каменьями меташу на тя, и горькое убиение свое сим весьма усладивши и к Богу возшедши – услади и наша скорби, блаженная дево, да сладостно зовем ти: Радуйся, святая горце Сладчайшаго возлюбившая: Радуйся, славная, во Иисусову сладость горесть земную обратившая. Радуйся, язвы Господа твоего на теле твоем понесшая: Радуйся, ангельски тому послужившая: Радуйся, злобы неверных не устранившаяся: Радуйся, верных сердца возвеселившая. Радуйся, святая мученице Зинаидо, молитвеннице о почитающих тя.

### **Кондак 9**

Всякое естество удивися Зинаидо, сиянию в тебе благодати и богатству добродетелей: ангелоподобной чистоте твоей, мужеству в скорбех и страданиях. В немощном женском телеси проявленному, крепкой любви ко Христу и многому состраданию к людем, в них творила еси преславная во еже пети: Аллилуиа.

### **Икос 9**

Ветии многовещанные не возмогут по достоянию восписать подвиги твоя, добропобедная мученице, како непобедимою Божию благодатию, юная дева сущи победила еси древняго исконнаго врага и посрамила еси идольскую прелесть, множество душ ко Христу приведши. Мы же удивления исполнении, в немощи витийства нашего смиренно взываем ти: Радуйся, ангелов радостное зрелище и человеков благоговейное удивление: Радуйся, демонов горькое рыдание и служителей их безсильное ожесточение. Радуйся, кровь за Христа пролившая: Радуйся, тело за Него к мученической кончине предавшая. Радуйся, с великим Павлом твоим течение совершившая и веру соблюдшая. Радуйся, во дворех перворожденных на небеси вселившаяся. Радуйся, святая мученице Зинаидо, молитвеннице о почитающих тя.

### **Кондак 10**

Спаситель и Господь, многажды утешая други своя вещаше Сам пречестными усты своими: «Поминайте слово еже аз рех вам. Несть раб болий Господа своего, аще мене изгнаша и вас ижденут; аще слово Мое соблюдаша и ваша соблюдут». Сия вся сбывшаяся видим на тебе святая Зинаида, тебе бо верную рабу Господню еще и погнаша помнози неверии во образ Господа твоего, но кольми паче мнози от

человек твое слово соблюдоша! С ними и мы о тебе вопием Спасу: Аллилуиа.

### **Икос 10**

Царю и Богу своему яко жертва благоприятная принеслася еси, богомудрая страстотерпице, темже со Христом в небесной сени пребывающи, и нас пред престолом Его не забуди, зовущих ти сице: Радуйся, с радостью понесшая за Христа поругание: Радуйся, праведное приявшая по трудех твоих от Него воздаяние. Радуйся, агнице кроткая от лютых воинов телом растерзанная: Радуйся, ластовице быстрая от духов злобы поднебесных на мытарствах душею не удержанная. Радуйся, в радость Господа твоего скоро вшедшая: Радуйся, и наша прошения к нему возносящая. Радуйся, святая мученице Зинаидо, молитвеннице о почитающих тя.

### **Кондак 11**

Пение сие акафистное, вемы яко много не довлеет ко истинному похвалению твоих добродетелей святая мученице, обаче елико мощно может помощи твоя праведная молитва нам недостойным и за сия малыя песнопения аще токмо от чистаго сердца твоя вознесем и с любовью о тебе возопием Богу: Аллилуиа.

### **Икос 11**

Светозарнаго дне всеобщаго мертвых воскресения и страшнаго суда Божия чающе ужасаемся лютых наших деяний и безмерных грехов, имиже ежечасно прогневаем Создателя и Спаса нашего. Но имеюще тебе, блаженная предстательнице за нас пред Господем, яко мудрую Евангельскую Деву, жениха в полунощи светло сретившую, надеемся и нам дверей чертога небеснаго не затворится твоими молитвами зовущих ти таковая: Радуйся, дево, премудрая со светильником горящим полным елея добрых дел ко Христу ишедшая: Радуйся, на брак агничий со избранными радостно и победоносно во светлой одежде вшедшая. Радуйся, пред престолом Агнца закланнаго с душами убиенных за Слово Его, песнь возносящая: Радуйся, на престоле Славы судити хотящаго, о мире умоляющая. Радуйся, наипаче о множестве тезоименитых твоих на земли живущих, спасения пред Богом споручнице: Радуйся, и в вере усопших тезоименитых своих, грехов прощения и райских дверей отвержения молебнице. Радуйся, святая мученице Зинаидо, молитвеннице о почитающих тя.

### **Кондак 12**

Благодать от Бога дата ти бысть еще в жизни временной, преблаженная, врачевати душевныя и телесныя болезни к тебе

притекающих, веруем убо яко в жизни вечной и блаженной у Бога, прославльшаго тя и к себе приблизившаго наипаче сих дарований преисполнена еси, и можеша помощи всякому человеку во всяцей скорби и болезни с верою к тебе прибегающему и Богу православно в теплоте сердца возопившему: Аллилуиа.

### **Икос 12**

Поюще твоя апостолом равная труды, подвижническое житие и страдальческую кончину, приснославная Зинаидо, молим тя простри твою с небеси помощь на нас, живущих во тьме страстей и искушений и твоим пред Богом дерзновением скоро воздвигни от одра немощи души и тела вопиющих ти: Радуйся, с Мариею, Еленою, Ниною, Ольгою и иными, яко их подвигом по силе твоей уподобившаяся славимая; Радуйся, с мученицами девами Феклою, Варварою, Екатериною, Анастасиею и сестрою Филониллою и прочими во светлом лике торжествующая. Радуйся, с преподобных дев Пелагиею, Феврониею, Мариею и иных чины, яко отшельнице ликовствующая; Радуйся, с Космою, Дамианом и Пантелеимоном и всеми целители, яко безсребнице прославляемая. Радуйся, со Ангелы и всеми святыми в торжестве церкви небесней пребывающая. Радуйся, и нас грешных от единства церкви земная не отпадающих не забывающая. Радуйся, святая мученице Зинаидо, молитвеннице о почитающих тя.

### **Кондак 13**

О, преславная страсотерпице Христова Зинаидо, кроткая Его угодница и всегдашняя о нас к Нему молебнице. С верою, надеждою и любовию ко твоему предстательству пред Богом по Богородице нас притекающих приими и от всяких болезней, бед и смерти умоли, да с тобою взываем Богу: Аллилуиа.

**(Этот кондак читается трижды, затем икос 1 и кондак 1)**